

1. **Centar za razvoj medija i analize (CRMA)**, kojeg zastupa direktor Eldin Karić, sa sjedištem u Sarajevu, Dalmatinska 1,
2. **Udruženje INFOHOUSE**, kojeg zastupa direktorica Dženana Alađuz, sa sjedištem u Sarajevu, Skenderija 15, i
3. **Vlada Zeničko-dobojskog kantona**, koju zastupa premijer Miralem Galijašević, sa sjedištem u Zenici, Kučukovići 2,  
(u daljnjem tekstu: strane potpisnice), zaključuju:

## **MEMORANDUM O SARADNJI**

### **Član 1.**

Centar za razvoj medija i analize (CRMA), kao nositelj i Udruženje INFOHOUSE, kao glavni partner programa Antikorupcijske mreže organizacija civilnog društva u BiH – ACCOUNT, koji je finansijski podržan od strane Američke agencije za međunarodni razvoj (USAID), pružaju tehničku, savjetodavnu i aktivističku podršku organizacijama civilnog društva u njihovom djelovanju na sprečavanju korupcije i borbi protiv korupcije u javnom sektoru u Bosni i Hercegovini (BiH).

Memorandum podržava sprovođenje zajedničke aktivnosti strana potpisnica na realizaciji Akcionog plana Vlade Zeničko-dobojskog kantona za borbu protiv korupcije (2017-2019).

### **Član 2.**

Predmet ovog Memoranduma je formaliziranje saradnje između strana potpisnica uključujući tehničku podršku projekta ACCOUNT realizaciji Akcionog plana Vlade Zeničko-dobojskog kantona za borbu protiv korupcije (2017-2019), u dijelu koji predviđa učešće organizacija civilnog društva u povećanju prevencije i sprečavanju korupcije na području Zeničko-dobojskog kantona.

### **Član 3.**

Saradnja i tehnička podrška u realizaciji predmetnih aktivnosti ostvariće se kroz načela partnerstva, transparentnosti, odgovornosti i međusobne informiranosti strana potpisnica putem unaprijed utvrđenih kanala komunikacije.

### **Član 4.**

Periodično, kada se to bude smatralo prikladnim, strane potpisnice će organizirati sastanke radi pregleda ostvarenih rezultata u aktivnostima koje se provode na temelju ovog Memoranduma, te u cilju planiranja budućih aktivnosti.

### **Član 5.**

Memorandum definiše oblast saradnje, tehničku podršku i razmjenu informacija strana potpisnica, a posebna pažnja će se posvetiti:

- Mjerama iz Akcionog plana Vlade Zeničko-dobojskog kantona za borbu protiv korupcije (2017-2019) koje se odnose na učešće civilnog sektora na sprečavanju korupcije i širenje svijesti o štetnosti korupcije, s akcentom na izradu strateških dokumenata/smjernica za borbu protiv korupcije u javnim ustanovama i lokalnim zajednicama na području Zeničko-dobojskog kantona, zagovaranje primjene i promociju istih.

- U skladu sa potrebama Vlade Zeničko-dobojskog kantona, potpisnice ovog sporazuma definisaće prioritete ciljeve iz Akcionog plana kako bi dogovorili preduzimanje adekvatnih aktivnosti na institucionalnom sprečavanju korupcije u javnom sektoru na području Zeničko-dobojskog kantona i usklađivanju istih sa općim principima Akcionog plana Strategije za borbu protiv korupcije Agencije za prevenciju korupcije i borbu protiv korupcije (2015-2019).
- Realizaciji zajedničkih projekata u cilju unapređenja prevencije, koordinacije i borbe protiv korupcije u javnim ustanovama i lokalnim zajednicama na području Zeničko-dobojskog kantona.
- Organizaciji i učešću u obukama, seminarima, radionicama i drugim specijalističkim modulima edukacije kao i razvoju svijesti javnosti o institucionalnom sprečavanju korupcije u javnom sektoru, u skladu sa potrebama i na zahtjev Vlade Zeničko-dobojskog kantona.
- Predmet saradnje mogu biti i druge aktivnosti iz nadležnosti strana potpisnica, definisane pozitivnim zakonskim propisima, koji uređuju oblasti iz nadležnosti strana potpisnica. Pri tome, navedene aktivnosti ne ograničavaju strane potpisnice u obavljanju aktivnosti iz njihovih nadležnosti.

#### Član 6.

Potpisivanjem ovog Memoranduma, strane potpisnice su saglasne sa realizacijom aktivnosti koje su predmet ovog Memoranduma, a koje će se realizirati u skladu sa vremenskim rokovima definisanim Akcionim planom Vlade Zeničko-dobojskog kantona (2017-2019), važećim propisima, odredbama ovog Memoranduma, i duhu uzajamnog povjerenja. Strane su saglasne o promovisanju saradnje i zajedničkog djelovanja.

#### Član 7.

Ovaj Memorandum se zaključuje na period do isteka trajanja strateških mjera koje su predmet ovog Memoranduma, a može se staviti van snage sporazumno ili jednostranim raskidom, ako ne narušava realizaciju aktivnosti koje su u toku.

#### Član 8.

Memorandum stupa na snagu i primjenjuje se od dana kada je potpisan od strana potpisnica, a sačinjen je u tri (3) istovjetna primjerka od kojih svakoj strani potpisnici pripada po jedan (1) primjerak.

U Zenici, 02.02. 2017. godine.

Broj: 02-14-1420/17

za Vladu Zeničko-dobojskog kantona

za INFOHOUSE:


za CRMA:



Miralem Galijašević, premijer



Dženana Alađuz, direktorica



Eridin Karić, direktor